

四庫全書

集部

欽定四庫全書

集部

石倉歷代詩選卷四百

六十九至  
七十二

詳校官石中允臣薩敏

侍讀臣孫球覆勘

總校官進士臣朱 鈐

校對官中書臣李 奎

謄錄監生臣唐 燦

欽定四庫全書

石倉歷代詩選卷四百六十九

明 曹學佺 編

明詩次集一百三

王九思

白頭吟

種花不盈藩種槿常滿園結髮為夫婦中道相棄捐今  
為陌路塵昔為比翼鳥鳥飛東西去芳華不自保盈盈

白玉片落落長松枝松枝附女蘿白玉生瑕疵春風透  
綺疏纖帷鑒明月獨坐彈鳴琴曲哀絃易絕晨興汲井  
水當窓理素絲素絲結易解君心諒難移白頭誓偕老  
理無乖隔萌衆女善謠詠情愛一時傾妾身如舜華君  
心若流水流水去不返舜華亦徒爾浮雲起西北遙望  
涕汎瀾思君君不知賤妾當何言

夏夜

時雨淨飄塵東方出明月明月照我懷况復微風發仰

觀星宿稀斗柄空中揭鳴蟲各及時栖鳥巢深樾桃李  
競春榮坐見羣芳歇人非金石姿憂傷徒自伐得酒且  
為樂無勞悲素髮

呂子仲木遺其弟持書見訪酬答來意

佳人抱沈疴高卧涇川潯閉戶理瑤瑟寥寥稀賞音白  
雲宿高槐清風吹古岑茅簷流月輝照見千載心戀故  
結遐夢道長違盍簪暮秋仲氏至恍如顏色臨遺我尺  
素書瑱然璆與琳上言長相思乃在終南陰再拜謝仲

氏此意良已深我欲往報之愧乏雙南金含情靡終極  
坐晚楓樹林

花下對酒憶康五

林棲鮮儔侶芳醕仰獨親繁香媚旭景嘉賞及茲辰習  
習谷風發萋萋卉木春黃鳥鳴枝間翩然求其羣對此  
豈不樂念彼同心人夙志干泰清麗藻回天文久要意  
不薄惠言蘭吐芬室遠心徒勞追趨靡所因安得驂雲  
霓頃刻馳見君

對菊有懷諸友

東籬零露滋秋色燦盈目仙姿有殊類密葉映深綠時  
維霖潦收欣看林釀熟引觴聊自酌玩此羣芳馥白雲  
何英英南山亦蟲蟲微風吹我衿飄飄絕煩熯杖藜行  
且謠清商發新曲仰視歸雁翔翩翩亦何速慨我平生  
親佳人在空谷逸氣蛟龍騰貞懷鸞鳳伏川原邈相隔  
鷦鷯不可屬徘徊日空暮歎息倚修竹

北遊

僕失夙嚴駕曰予徂渭陽出郭縱遐眺原野何茫茫是  
時春氣浮雪融塵不揚條風應候至征雁復北翔汨汨  
水泉鳴岸柳柔且黃感茲悅心意寧知道路長因思在  
環堵俛仰徒面牆安得長山遊撫景以徜徉

春日宴集示諸友

嘉辰苦遄逝為樂當及時韶華盈陋園良朋復在茲列  
坐茂樹陰瀟灑多令儀時羞薦芳馨濁醪引滿卮物菲  
意乃勤主獻賓不辭珍葩映虛牖好鳥鳴高枝感茲發



天籟鏗然吐麗詞  
謙謙二三子  
盈盈冰雪姿  
歲寒盟勿渝  
好爵吾與縻

過慶善宮

皇天頗厭亂  
太宗當其衝  
天歌起晉陽  
矯矯雲中龍  
乃知溝澮間  
神物固難容  
誕育在茲壤  
山川靈氣鍾  
清渭環其區  
終南如堵墉  
遺宮閒蕭爽  
朝暮聞清鐘  
宮前斷碑卧  
雨深苔蘚封  
土民或拜舞  
卜歲求豐凶  
樵牧不敢入  
亦欽王者蹤  
客從潁西來  
經此南課農  
下馬瞻闕像

進止還肅雖

彭麓山房宴集

空有紅珊瑚盈盈高數尺持之博村酤反為農夫檻相  
逢不一醉別後怨疇昔我今有美酒來坐松下石勸君  
君不飲騎馬將安適不見桃李花落盡五侯宅

懷粹夫

悠悠勞我思美人在河內偃息明月品殮霞吸沆瀣隔  
別數經秋歲序不少貸伯勞與飛燕東西歎違背願為

比翼鳥飛遊浴情愛

四皓圖歌

征夫血染長城地諸生魄落咸陽市博浪沙中客漫驚  
商顏山下人先避沐猴授首烏江底汗馬論功未央裏  
上皇生兒與仲多戚姬有子真如意鼎足搖搖誰與扶  
吃口期期亦是愚赤松黃石有仙訣具書奉幣奔山嵎  
冥鴻徒侶雲間落野鷄母子宮中躍漢庭羅網竟何為  
商山芝草仍堪嚼芝草幾莖經幾春商山此日無此人

楸枰散亂隨流水松桂蕭條空白雲高車駟馬憂方大  
龍湫虎穴人爭坐立志不從東海遊甘心況受西山餓  
千古閒情笑我癡四翁不見使人思聊對畫圖歌一曲  
疑聞風雨下長陂

催官軍赴潁上歌

銀鞍繡甲劍在腰馬鳴十里風蕭蕭羽旗猶轉杏花塢  
鐵騎先過楊柳橋將軍妙手逞輕捷一箭飛落雙皂鵬  
道傍觀者衆如堵奔走流汗喜欲舞老父嘆息忽不樂

暮年今見持戈斧七日賊圍潁上縣一縣萬人命如線  
聞說提兵李僉事日夜登城奮孤戰城中婦子愁唧唧  
恨不人人生羽翼晨炊走汲井水竭夜號聲繞春雲黑  
步兵間道單身出簡書馬上飛來急豈謂轅門坐風雨  
不念愁城卧荆棘叢侍郎馬都督請君早發元戎纛淨  
掃煙塵四十里我亦西歸杜陵曲

周將軍歌

十五學擊劍二十學用兵猿肱燕頤將門種丹書紫誥

金匱盟大明天子自神武日向虞階舞干羽渥洼龍駒  
滿帝閑越裳翡翠來天府長纓欲請繫單于廟堂勿用  
開疆土歲月悠悠老將至封侯萬里無由遂被酒酣歌  
缺唾壺臨風雄辯揮如意大兒蟠胸五千卷紅雲留侍  
通明殿元孫指掌八陣圖青春拜受將軍弁將軍卜築  
淮水濱買田蓋屋栖白雲刁斗漫隨程不識園林恰似  
何將軍垂楊裊裊細煙霧短竹瀟瀟繁雨露芰荷香散  
碧池風琴樽興戀青山暮山中甲子經七旬堂下曾孫

看幾度劍舞時令膽氣粗  
鏡光長許仙顏駐  
跨馬夜射南山石  
韝鷹曉獵中山兔  
射獵年年樂未央  
山谷小虜今跳梁  
棘門霸上真兒戲  
野草飛沙空戰場  
浮生感歎雪盈首  
世事蹉跎柳生肘  
掃塵時復看龍泉  
安得將軍却少年

畫葡萄引

漢武惟知貴異物  
博望常勞使西域  
大夏康居產富饒  
胡桐檉柳非奇特  
獨取葡萄入漢宮  
遂遣天王親外國

當年肉味厭侯王今日霜根徧西北吾家十畝後園裏  
長條幾架南山側龍鬚時裊水風斜馬乳盡垂秋雨色  
故園一別驚風雨畫圖相對思鄉土青錢已辦顧河舟  
白首行看住草樓但願千釭釀春酒未須一斗博涼州  
同康侯觀胡公泉歌

鄠西丈八村東側平地湧泉映空碧繞岸圓甃數十圍  
澄波到底餘五尺石罅暗瀉東北流旱亦不竭潦不溢  
東北萬頃樹杞稔歲資灌溉蒙膏澤泉頭廟貌祀胡公



歲久傾圯委岡脊康侯歎息語父老新廟亟成何煥赫  
侯來呼我共遊眺匆匆下馬日已夕刲羊醺醑安靈畢  
下走覓泉憩苔石水面綠萍命掃拭雲影天光可指畫  
泉眼甞拂底見沙荇根游泳鰕與鯽時維二月雨新霽  
花柳映帶春拍拍汲泉煮茗試一啜頓覺清風生兩腋  
康侯興狂起欲舞嘯歌聲激浪花白人言康侯文雅世  
無匹只恐天子召之臺端簪白筆難戀此泉常挾客

春暮歎和對山子

春風吹白日飄蕩無停時明朝忽復見日出青春不返  
那得知楊柳陰陰一徑微落花游絲雙燕飛桑落酒香  
碧玉壺美人不來空我思印佩累累五陵客自快幾時  
翻自悵何如扁舟泛五湖長遊不受人促迫磊落誰似  
許西君春日題詩許我聞欲擬剪裁那可得恍惚變化  
春空雲

許西行和對山子

猛虎伏空山怒廢千夫力虎心如我知日久亦可憊吁

嗟世人心反覆安究極對酒休憂白髮新看花且趁青  
春色鸞鳩斥鷃亦能樂扶搖何必垂天翼許西夫子藐  
世人胸中別有千斛春文章氣凌漢太史科斗書輕王  
右軍飄風自北來寄我雙錦文邀我去遊潁西曲花前  
坐玩淖水紋泥封未破桑落酒錦瑟先招翡翠羣我亦  
平生愛歌舞向來慷慨成虛語千里命駕羞呂生雪夜  
王猷誰復許白駒皎皎食君場風流盧駱王與楊棲息  
忽看夜月滿登眺不知春日長春日同遊各盡興夜月

多情還舉觴太平不飲果何待顧乃真醉非徭狂君不  
見古來治老苦無藥坐見桑榆影閃爍子有酒食當及  
時何不鼓瑟日喜樂笑我田舍翁未能游雀躍不及諸  
君山水情亦有草堂在西郭

南山行寄熊子修

我病一月不出戶雲夢先生遠相訪殷勤兩度入我室  
我聞談笑覺清爽興來挾客南山遊陰翳經旬忽開朗  
老天有意山靈喜蒼翠排空待吟賞草堂寺中參古塔

紫閣峰前眺仙掌陸海混茫萬餘里瀑布飛來幾千丈  
先生興狂渾欲飛醉拈彩筆掃翠微瑤草瓊葩盡收拾  
奚囊背得南山歸遺却兩枝在茅屋琅玕五色炫人目  
世人不識雲夢仙燕雀紛紛逐鴻鵠吁嗟乎天風一朝  
鴻鵠起燕雀紛紛亦徒耳

聞賊至登壽州南樓野望

極目川原外無言自愴神雲山晴見楚煙樹遠浮秦平  
地干戈滿臨風羽檄頻西飛羨歸鳥隨意過城闔

入關

客子來何暮關門愧昔賢首陽祠未遠商洛路依然飛  
鳥三峰外孤城落照前終軍今白首非復棄繻年

夏日樓居漫興

世泰容吾拙官閒似隱居苦吟遲得句倦讀卧看書山  
色憑欄外花香退食餘老親身更健千里寄雙魚

憶昔

憶昔瀛州選淒涼老鳳羣欲將淮海淚哭向秦陵雲王

國風雷少昆岡玉石焚數奇千古恨不獨漢將軍

澣西庄春日行樂詞

渭北神仙府春來樂事多花枝侵舞榭日色艷宮羅麗  
曲嬌鶯妬紅顏細馬馱更憐明月上流影入金波

又

金馬當朝彥銀魚隔歲焚高樓丹鳳麓閒卧碧山雲湘  
瑟春風度秦箏月夜聞太平無一事只合醉朝曛

周守惠茶謝答

老去難勝酒間來獨倚樓使君題玉版仙茗自金州春  
泛玉泉色香分漢水頭枯腸從此潤短咏若為酬

草堂別貞夫

不盡登山興其如送爾情秋風臨路發征馬向人鳴白  
髮偏多恨皇華自有程相思虛夢寐迷却鳳凰城

答禹夫春興之作次其韻

玉笋春醅綠金釵舞袖紅遠山凭雪檻佳景落詩筒桂  
子雲霄上荆花雨露中衡門三十載不出是英雄



東康五

冬徂春已半不得澣西書老恨追趨懶相思夢寐餘  
花開正好桑落興何如七十今年是應勞長者車

贈邵鍊師

去夏長安別今春鄠杜逢暫留山閣住難繫野雲蹤  
避客封丹火談玄坐古松明歸栖隱地花鳥徧吳峰

過張時濟少陵山莊

少陵野老去不返十畝山田多白雲新築茅堂爾為主

獨栖崑洞誰與羣  
夏日來就碧窓卧  
午風細灑青簟紋  
飄然夢覺坐苔石  
笑飲竹泉歌夕曛

符園對月

微風裊裊動花園  
皓月娟娟照酒尊  
且聽玲瓏歌白雪  
寧勞阿段報黃昏  
涼生芳草遊人卧  
影挂柔枝宿鳥翻  
乘興便為行樂地  
青鞵何必到龍門

汴東宴集值風雷大作

日暮俄吹萬里風  
西原牛馬下龍從  
震雷挾雨千峰黑

高岍飛花一澗紅  
掃興頓教棋局散  
停歌非為酒樽空  
須臾玉宇還開霽  
皓月留人意未窮

無題

寂寞西風翡翠樓  
黃昏斜抱玉箜篒  
彩鷺影逐秦簫斷  
紅葉心隨御水流  
天外行雲難入夢  
手中團扇易驚秋  
愁來只恐嫦娥笑  
明月疎簾不上鉤

詠華陰李太白

騎驢寧避華陰令  
走馬曾於五鳳樓  
采石狂遊醉欲死

長安不見却生愁名齊杜甫追風雅運落南箕起謗尤  
過客悲吟蓮嶽下問來元是謫僊流

詠華山陳圖南

華山隱士羨圖南高卧于今尚有龕花鳥多情誰作主  
雲霞無恙夢猶酣玉峰臨路空勞望鐵索懸厓不可探  
我欲東尋劉禹錫結茅同住碧巉巖

中秋不見月和答湘厓蔣子

懶上元龍百尺樓清光不似去年秋南飛烏鵲渾無影

斜倚闌干恨轉幽縱有金罍誰共酌空聞玉漏換更籌  
嫦娥只在雲深處閉却廣寒應自愁

太微子過訪留詩因次韻以贈

山下孤村水竹居城西樽酒漢陂魚青春不負岑參約  
彩筆今看杜甫書花柳半開風乍暖煙霞留住日無餘  
明宵又作懷人夢咫尺長安萬里如

洛原為白子賦

僊楫已浮南渡水故家猶問北邙山迢迢歲月遷移後

隱隱鄉閭夢寐間  
風氣不隨金谷散  
雲仍今見玉麟還  
芳隣近接程門迥  
數仞宮牆尚可攀

秋興

霜落長城萬草枯  
三邊兵甲盡防胡  
千年充國屯田計  
萬里嫖姚出塞圖  
寂寞魚龍沈瀚海  
哀鳴鴻雁憶菰蒲  
閒情欲共伊人語  
白露蒹葭水滿湖

二

秋風昔伴逐臣回  
此日逢秋意轉哀  
貝錦有言讒巷伯

黃金無夢到燕臺  
土堦步月青藜杖  
草閣看花濁酒杯  
垂老光陰吾願足  
補天自有出羣才

寄謝李宗易

白髮交情自布衣  
非關出入在黃扉  
癡兒生死勞恩及  
老淚縱橫豈浪揮  
萬里雲霄心轉切  
五更風雨夢初歸  
有時倚杖看台斗  
無限清光近紫微

聞貞夫將登華岳次韻一首寄上

好奇無奈洛原子  
躡屐去登西華山  
懸石獨沿鐵索嶺

浮雲笑指玉門關  
身浮萬疊煙霞上  
語落三峰紫翠間  
欲喚謫仙沽一醉  
旗亭秋草雨斑斑

十四夜月與李二獻吉飲

萬戶秋風砧杵哀  
殊方今夕故人來  
竹間涼露瀟瀟下  
樓上浮煙細細迴  
地僻柴門無過客  
家貧樽酒有餘杯  
疎簾碧簾須同醉  
明月青天為爾開

顧孔昭出守馬湖

東閣當年共詞賦  
嗟爾分曹違素心  
繡衣持斧郡國動



桃李無言蹊徑深  
煙際乘舟去裊裊  
雲邊望闕常陰陰  
漢官獨重二千石  
行路不難休苦吟

春興

巴城寂寂帶江樓  
城下清江不斷流  
鳥道入雲通白帝  
漁歌終日起滄洲  
英雄不廢嚴顏廟  
割據深知漢主憂  
修竹早梅俱有意  
少年春復與同遊

二

憶在梁園詩興發  
康王城北見黃河  
信陵公子蕭條盡

白髮侯生感慨多  
落日酒酣提劍舞  
中流風起扣舷歌  
十年徒侶仍稀濶  
裊裊行雲奈爾何

三

文皇有意築燕城  
隔斷祁連百萬兵  
宮闕九重懸象魏  
河山千古奠神京  
匈奴近入雲中塞  
大將誰屯細柳營  
總制獨推少司馬  
不知烽燧幾時平

雪夜

張生愛雪真成癖  
雪夜顛狂走未休  
焉得此時同載酒

翩然乘興一登舟  
寒窓自照疎燈坐  
布被聊為穉子謀  
舟到山陰即回首  
却令千載慕王猷

趙汝承郡閣燕集次韻

遷客當年去國時  
西風灑淚滿瑤卮  
屋梁夜月懷人夢  
一日三秋采葛詩  
淮海蒼茫歸棹久  
山林疎散入城遲  
考槃徐孺今誰是  
下榻陳蕃荷爾私

杏村卜築次韻

壯夫生世豈無家  
宦海乘桴未有涯  
新築傳言丹荔好

故山回首白雲遮廟堂正爾需才俊雨露今看沐寵嘉  
霞艷早裁西蜀錦春風先到上林花

戍樓角

裊裊空中雲隱隱樓上角西風吹不斷時向雲邊落

壬戌元宵應制

龍池春早月華新煙霧香生輦路塵一夜六宮歌舞倦  
晨朝還有聽鷄人

石倉歷代詩選卷四百六十九

欽定四庫全書

石倉歷代詩選卷四百七十

明 曹學佺 編

明詩次集一百四

王尚綱

扈礪謠

笑殺蒼谷子結茅扈礪傍衡門交蔓草三月閉春光  
細雨朝來策疲馬一蓑骯髒眠繩牀隣人漉酒邀余去髣

鬚王喬栖隱處擊鼓鳴鐘方袒踞雲液瑤漿祛俗慮瑤  
琴一弄風落絮瑞煙縹緲雙鸞翥覆觴便欲隨仙馭洞  
中丹霞剩有情勸我青精飯一筍出門杲日光破山雨  
脚腫隴雲意閒清風萬里振天末回頭芳樹非人間由  
來是蒼谷長謠下扈澗澗中風景人不聞對山聊作流  
水漫崢嶸東飛旗影青三峰矗矗樹闌屏莫道山人醉  
無事讀書臺上閱金經頽然一覺芸窓曉布穀林端啼

野鳥

歌湖馬長官督學湖南送以春風一章

驅車過鄧林，撐雲蔽日豫樟深。  
維舟度湘水，潛蛟鼓浪排山起。  
使君此去若為別，出門萬里江山雪。  
春風芳草何曾歇。

期仲默不至孤坐偶書

買宅城西隅，退食慚幽獨。  
閉門芳草間，誰復憐修竹。  
涼飈滿四隣，海月照山屋。  
仰視雲間鴻，冥飛不可逐。

雨坐

細雨良不惡鳴聲蕉葉間孤琴罷尊酒對此草堂間移  
情向雲水風帆天際還野蔓開荒徑從君歸舊山

郊行

壯歲不曉事意期天地長殷勤簡諸集殊無不死方委  
填竟何所佩劍迫難忘青天空鶴唳孰與哀北邙

贈李解元行

易水蕭颼處秋風聽短吟雲來村樹暝蟲響豆花深舊  
篋猶懸劍高齋已罷琴留君渾未得寂莫數年心



和商寅長雨後韻

雨後尋幽會相逢復故人  
高秋淨綺席澹月散芳隣  
汝水春來興京華歲暮身  
登樓無限思肯厭去來頻

兀坐讀空同子詩有懷大復

幾年詩卷未曾開  
紫邏雲山憶鹿臺  
午漏旌旗隨日轉  
天門鐘鼓放朝迴  
憐才不見李生久  
動興還如何遜來  
舊事新愁俱蹭蹬  
清霜落木益堪哀

度關奉賡邃老韻兼懷諸子

三十年前華嶽還棄繻誰識此潼關虹橋漫指天涯柱  
華榜曾遊夢裏山無地可能忘舊隱有僊端合駐童顏  
親交他日傷凋落翠壁丹崖想自攀

答陳虞山

姑蘇江口懷君地夢裏分明數往還罷藥焚香開舊卷  
小亭終日對虞山

和梅國韻

潁谷已非梅國意考槃何地渺煙蘿不愁薇蕨歸來晚

海畔風高暮雨多

再入華山

松逕煙蘿澗水深  
金風獨上華山岑  
真源欲問來時路  
滿地桃花何處尋

孫偉

字朝望有  
鷺沙集

畫意

野行不出遠步入橋之東  
雨晴農事盡水邊村逕通  
所欣抱澗人玩心於此同  
坐看薄雲生宛媚桃花叢  
柴門

澹松桂鷄聲鳴午春幽憩適天性送目春飛鴻嫣然吾  
得我意在忘言中

出塞曲二首

路繞飛狐西心與大刀折鼓聲斷重圍斜日陰山雪陣  
雲隨草低殺氣傍城結何人哭遼水水上青燐滅邊色  
寒蒼茫老將節旄絕胡馬蹄足高踏冰如踣鐵露宿黃  
沙戍哀笳增哽咽征人半未歸分甘死饑渴家山常在  
眼莫念經年別

二

軍人莫采芑佳人莫夢蘭采芑地不生夢蘭徵驗難即  
戎有簡書內私置若干城邊戈可枕塞上雪可餐寄衣  
是何日縮肉且忍寒烽火時一紅淚落山鬼間重氣自  
輕生而暇憂摧殘君看交河水萬馬飲不乾願河向東  
流東流近長安

同養齋遊慧力寺

禪房閑幽閒依依近寒城江光動林景巖霧迥陰晴日

宴遠山出新松差長成客來僧自起坐久鐘亦鳴窈窕  
竹廊靜時復蘭煙輕眷此同年友暫駐車馬榮契濶慰  
初展語散情復縈法侶喜相偶煮茶支跛鐺碧甌濯孤  
興起愛緣雲行憇澗悅佳樹冷飈徐有聲且復一懽酌  
放歌滄浪清

登毘盧閣

秋意集高欄夕陽澹羣壑飛雲在襟袂語笑應寥廓林  
響吹霜氣時見一葉落川帆去前浦煙鳥迴丹閣素懷

塵外想及此靜中樂俯仰易為陳溪山宛如昨登臨亦是夢感歎空悠邈黃花昧節候冷露浮青萼撫花聿申寫作詩解禪縛

小畫二首

古人翳深壑孤雲時往還  
品花與藥蔓無人終日閒  
泉響落林曙有路穿其間  
未覺前山夕悠然還入山

幽賞盈所抱心期信一邱  
林煙貯茅屋歲月懷良儔  
草青不近路日斜聊繫舟  
夕水涵秋白孤鴻自去留

春日遠郊

東阡一雨霽溪口聞流泉行春愜遊事沽酒盡俸錢林  
芳囀幽鳥澗日明孤煙不負黍稷稅耦耕今在田

仲春郊外

水香木蘭櫂日照桃花津沃轡轉遙壑餉煙吹四隣適  
茲文墨暇欣彼物華春所思屬霄漢感歎清路塵

對酒

芳樽臨楚水幽思誤濠梁常憇春鳩亂蘋流晚岸香艱



難瞻使節貧賤耻賓行獨有風前桂朝來借露光

松鶴壽彭敬之

靈柯百尺摩蒼穹老骨鬬石如青銅長風劃然起煙壑  
戟髯怒卷霜瞳瞳一雙白鶴好毛羽順風不羨黃鵠舉  
千歲歸來問城郭南山只有松陰主松陰主人誕長生  
持觴愛此青田鄉何時雲間騎一隻玉笙吹月上瑤京

雪景圖

天風夜撼玻璃國四面沈沈元氣黑荒林野屋曙難遠

世界江山盡瑤色山翁倚檻立蒼茫一鳥不鳴山外村  
冷光十里斷人跡玉樹皓皓橫山門溪寒沙淺水煙滯  
仙姝犯曉停風馭雪中忽憶清泠橋詩逋老去憑誰寄

戲題出獵圖

朔風蕭蕭雁門道邊色寒蒼動枯草白草無邊殺氣高  
雲中射獵雞鳴早琱弓一聲墮水聞箭帶清哀雁落雲  
狂盧閃襲黃龍磧狐兎橫奔血路分解表下馬平原立  
掠地蒼鷹羽毛濕燕姬一曲陰山歌巨羅滿注羊酥汁

蒲萄痛飲樂無涯歸來獵獵西風旗明馳獨峯載鮮獲  
他他藉藉紛追隨鞍馬為家射獵田賀蘭山外馬支前  
但令蒼鹿黃羊壯即是三秋大有年

雪航題號

長江瀉水下建業海門潮色動眉睫北風連山卷雪飛  
波底客舟凍一葉爾時木落江亦空舵牙撞水江之東  
萬鴉僵立礪石暗遙見縷縷茶煙紅城頭老樹低幾尺  
雲裏看山千仞壁斷蒲折葦僻沙港冷光直射蛟龍室

青山渡口月出皓鷺嶺夜半鐘聲到當壚一笑任吳姬  
醉著蓑衣脫貂帽

贈弟之蒲江縣

寒江催短日險蜀有人行窮巷違親舊哀懷托弟兄路  
當鴻雁別心與去帆征遠道加餐飯關河早寄聲

二

才人多被罪此意孰窺天身逐投荒檄心如未第年位  
疎惟應闕主聖自懷賢路出巫山雨騷人莫繫船

四景

野構延新霽輕雲放遠山酒添花木氣春與性情閒養  
拙無多事浮生有笑顏鳥聲渾識意只在釣磯灣

短榻橫清暇南山過雨痕薰風生草末積水浸雲根蕙  
思虛瑤瑟菱歌近酒樽但知真樂在相憶復誰言

九秋風色澹水落練花潭十步有芳酌一茅還舊龕南  
山今昨是夜菊醉醒甘懷憤義熙後誰將此意參

崑棲寡儔匹幽思渺難裁雪陣寒初閣江光晚未開轉

空聞語屑鏘韻上琴臺日暮看猶落漁翁罷釣回

贈黎侍御巡按四川

蜀雨巫雲不碍山使君親度萬重關秋花尚惜芙蓉錦  
川路頻驅橫石頑拄笏獨臨飛鳥上寫詩多寄翠微間  
金烏踏徧行臺柏驄馬遙歸十二閑

二

愛君詩思逼長江且酌霜英醉小窓燭裏談鋒新拔壘  
墀頭簪筆舊如杠滄洲弔影冥鴻獨霄漢連城白壁雙

西去岷山更西路有人饑渴拜旌幢

元日

鼓角喧春歲已除雪花如掌徧郊墟  
屠蘇又醉王正月童子不嫌吾舊廬  
江曙忽驚山亦老梅寒真與鶴添臞  
農人愛此占年事莫向邊關洒淚餘

二

梅花喜見一枝橫瓦雀連聲報曉晴  
三日泥穿東郭履六年人住楚江城  
川融石水源源動林晏春雲處處生

金  
滿面條風吹不斷  
閭山晴雪笠邊明

喜雨應吳太參二首

誰挽天河四月翻  
山雲曉護使君軒  
蒲葵半畝青紅濕  
鸕鶿滿塘黃濁喧  
滕溜暗添秧下水  
庖煙遠駐竹邊村  
怒雷莫促乖龍急  
枯槁惟宜霖霖恩

二

坐聽簷虛瀉沸濤也知真宰養民膏  
北窓夢覺增締綌  
南畝人歸罷桔槔  
鄉賽入村喧社鼓  
野塘生水受漁舸



雨師先及公田足為報官家撫字勞

十四夜月

夜久誰家舊鏡懸清光仍欠一分圓  
吳剛不解斲輪意李白虛傳問月篇  
兔影斜含丹桂陌鸞聲細墮白榆煙  
玉樓仙夢今非昨天步雲驂付少年

十五夜月

圓魄初升萬象奇  
霽光先泛碧梧枝  
清虛露墮疑蟾泣  
滄海書來訝鳳遲  
靈谷山高曾對酒  
洞庭秋好記題詩

廣寒仙樂開香宴法喜應拈玉笛吹

秋日遊慧力寺

清風兩袂度禪關繞檻蒼松記舊攀  
寒溜靜依雙澗在白雲長占一邱間  
酒酣送客迷江畔興至穿林坐竹間  
欲向定中談出入老禪惟看寺前山

二

村逕蕭蕭二里長尋幽翻訝與僧忙  
竹廊舊憶題詩處蓮社新開選佛場  
落日疎鐘遙渡水晚風黃葉暗驚霜

忽從伏馬橋邊過往事今因盡可傷

潁江歸自南昌

愁君遠道迷風雨邂逅忽隨風雨歸應為高堂念行李  
却從漁父借蓑衣昆蟲歲晚閉關早鴻雁江寒接羽稀  
天地慳賢于子極且須時命向荆扉

七夕

露下青楓暑未歸響空環珮轉輕微星宮一歲闕



迎春東徐太守

霽煙初放鳥初鳴  
萬戶春迎太守行  
人把陰晴占百穀  
天教風雨避雙旌  
江湖水動魚思泳  
山路寒輕木向榮

莫訝土牛喧鼓板，厥明辛苦是鞭聲。

贈別廖汝謙

一自狂歌有去舟，隴雲巴月遡河流。  
劍光遠射峨眉雪，客思閒消鸚鵡洲。  
鄉國又逢聽雨夜，天涯重憶寄書秋。  
征衫尚帶聞猿淚，笑拂風塵季子裘。

過石江子

簷外江聲落酒卮，老夫攜伴過隣時。  
醉醒只在荒城住，憂樂空煩短鬢知。  
白壁夜光誰按劍，綠琴心遠自調絲。

清談絕倒爐熏畔野性年來似鹿麋

雨中三首

盡日高齋聽雨眠數聲春燕語梁邊  
舊磯水漲知多少  
一夜清江阻釣船

石竹叢陰路不乾晚移殘興看春瀾  
落花風裏無人跡  
細雨誰憐翡翠寒

階前楚尾濕氍毹屏下紅燈照暮龕  
莫怪山人詩作癖  
却勝春雨憶江南

雜畫

村底閒門面石開  
青山如畫水如苔  
白雲久作孤舟伴  
流過清溪渡口來

山房小隱

此身天地一節長  
語笑含風草樹香  
莫道入山絕人境  
山前十里是柴桑

石倉歷代詩選卷四百七十



欽定四庫全書

石倉歷代詩選卷四百七十一

明 曹學佺 編

明詩次集一百五

張鳳翔

相逢狹路間

相逢狹路間  
路狹車不容  
錦衣二年少  
玉勒羈雙龍  
問君在何處  
君家人易知  
易知亦難忘  
金水河之湄  
金釘

次朱戶翠波通瑤池堂上奏絲竹堂下喧鼓鼙太宮錦  
欄腰登饌羅珍奇嬌娃俱二八魚貫傳瑤卮宮粉各殊  
別婉婉芙蓉姿清歌稱妙舞密眄揚修眉椒蘭蕩邪穢  
暗度青雲遠不知夕陽下但見華筵移兄弟兩三人置  
身俱不卑大者上柱國次者校尉司小者亦列侯中禁  
容奔馳五日一來歸中使相追隨輿圍綺羅蓋馬絡黃  
金羈門排虎牙杖室結蓮花帷大婦繡駕為中婦抱嬰  
兒小婦持斑管對局裁新詩丈夫且安坐玉笛不成吹

柔聲忽滿竅清響飛天涯

白馬篇

白馬如飛龍金鞍耀朝日腰下瑤房開龍泉山可劈上  
堂辭二親誓不顧家室西出長安門馳突如風疾遙望  
白龍堆欲擣玄狐窟羯胡撼地來北風吹膚篋交刃陣  
雲昏彎弓昴宿失登壇斬樓蘭傳檄收哈密功成勒天  
山闕河置津驛部列五校屯凱旋六師卒天子燕武英  
太史秉直筆豈恤萬戶封所貴吾事畢

湘妃祠

虞帝南征不復歸  
湘君日暮啼青衣  
秋風娜娜湘水冷  
愁雲化作清霜飛  
清霜著草草欲死  
著竹竹黃印斑紫  
蒼梧雲色凝不流  
夫君渺渺雲上頭  
曼聲浣月正愁絕  
何處雌凰聲不歇  
蟠龍起舞舞潭水  
波幽吟咽咽生盤  
渦  
癡雲作雨老天泣  
竹中奈此雙愁娥

南洲老人歌

南洲老人好吹笛  
鐵管橫江僅三尺  
清風灑灑拂紫髯

水底眠龍時唧唧江濤走石驪珠寒列仙隱約呼雲端  
白榆歷歷不可拾遺我一粒黃金丹刀圭入口骨毛爽  
兩腋生翰脫塵網銀橋四畔水瀾瀾擎斗捫天時下上  
琅玕瑤樹隱瑤樓廣寒宮闕凝素秋仙人倒乘九苞鷗  
招我同此汗漫遊招我同此汗漫遊夜來改我江南洲

江頭老人歌

茆屋江頭棲燕子暝樹微茫似煙雨江蛟弄月波水寒  
夜半何人歌白紵老翁起聽醒不醒短蘆乍有驚鷓鳴

玉壺墮影半窓白老翁醉卧魂冥冥夢中笑語不我答  
閒情似與江鷗狎

送人省覲

雨餘春漲桑乾水歸憶函關二千里高堂阿母日倚門  
孤雲凝睇愁夢魂西風千里入長安一封書上紅雲端  
麻鞋闕下拜天子乞地崦嵫出溫旨雪花如掌狐兔藏  
燕山老梅吹古香歲蛇赴壑不可捉馬上春風吹髻脚  
孤雲凝睇白雁歸越羅開篋裁征衣雨餘春漲桑乾址

黃金臺下花如綺，裏書匣劍西入秦。沙頭冠蓋何輪囷，  
伏劍對酒眼雙白。白石青山照行色，蒲帆闕滿古渡頭。  
亂山回首芙蓉稠，鳳皇城上雲起滅。十二玉樓春乍隔，  
高堂阿母日倚閭。夢魂時繞華山廬，汪倫當日送李白。  
我今與之情何如，中條太行接函關。黃河來自崑崙山，  
望中雲氣似車蓋。必有名世生其間，于公門間容駟馬。  
王氏庭槐自拱把，眼中見子已昂藏。他日相逢馬須下，  
賦得賀蘭山送李獻吉。

往年榆林告亟發公帑十五萬餉之大司徒檄以君  
往今年寧夏缺餉乃七萬金以君往君于邊儲遠情  
可謂勞且周矣諸交遊輩擇朔方形勝可詩者分詠  
贈焉而賀蘭之山未有作者君以行之先一日命鳳  
翔賦之遂從而為之詞

君本關西人乃作關西行往年使榆林今年使朔方西  
度黃河四千里眼中見此誠莽蒼賀蘭山高五千仞翠  
壁蒼峰削孤峻清泉百道草樹濃雄哉蟠據河南鎮山



西胡虜東中國何必長城分南北君不聞胡云奪我燕  
支山使我婦女無顏色賀蘭固是中國望可容胡虜燕  
巢穴我聞朔方兵不若榆林強不有賀蘭山朔方誰其  
當王公設險計守國地險如此功可量君齎公帑十七  
萬作氣鼓力功可斷死魚芳餌有明言要在得人富籌  
算古有班定遠克收西域生封侯亦有傅介子借劍立  
斬樓蘭頭甲兵百萬范老子西賊膽破誠壯猷君抱濟  
時具未償投筆懷此行亦是棄繻意賀蘭入眼何壯哉

左顧黃河流右摩賀蘭頂賀蘭日高河日深會當勒功  
摩石廩黃河洗甲山挂弓西望龍沙滅胡影

紅梅

雪山石滑走白兔羽衣翩翩鐵橋路手撚三尺紫珊瑚  
一片丹霞映霜素渴服臘脂井底泉饑餐瑪瑙甕中露  
換骨曾分紫府丹出塵不借清風屨乾坤二月春氣濃  
幸好逃奴逞妖嬈仙人絳節上瑤霄吹落香風滿寰宇  
黃鶴樓頭玉笛吹無緣得見藍橋姬安能盡度世間人

箇箇紅顏老能駐

盆荷

臨溪問花花不語愁對湘波弔堯女幽魂化作水上花  
阿誰剪取來君家知君深得種花術一朵兩朵冒波出  
玉立娉婷澹且閒碧簪竟插青泥間文花船藕嫌屋矮  
一片入口沈疴解出塵自恨骨未仙乘風無地超三千  
瑤池燕我開瓊筵雲中時聽霓裳篇

蘭竹

楚臯煙雨逗寒綠秋水并刀剪一幅龍雛逐節脫錦裯  
蛇老退皮擲青玉碧花淺淡香一叢綠葉芬芬清滿屋  
襲人堂下靡蕪秋憶我山中簞簞谷裁皮可製高祖冠  
紉葉宜為靈均服玉山只欲洗塵氛糠竅惟知厭梁肉  
豈知益友能化人更著此君可醫俗風霜抱節聽孤高  
日暮凌寒習幽獨君家有圃如瀟湘休種繁花種蘭竹

松鶴吟

養禽貴養鶴種樹貴種松鶴本遼陽仙松本徂徠公君

家老鶴，白如雪。萬里飛翔，乃所悅。君家老松，青如山。百圍偃蹇，那可攀。鶴兮鶴兮，時高舉。上寥廓兮，下滄渚。西過懸圃，啄青泥。不逐鴟鴞，爭腐鼠。松兮松兮，但孤撐。蟠后土兮，參青冥。歷諳寒暑，百不變。肯與桃李爭浮榮。嗚呼此松，與此鶴。閱世千年，但如昨。

對雪

客路經初白，寒深出戶遲。凍鴉棲易辨，宿鷺起方知。一水界空碧，諸山遺故姿。蹇驢傷徑滑，江上看梅時。

和李獻吉遊西山韻

君有踏春興招呼我亦從登高攀石磴眺遠聽山鐘風  
起偏依樹雲來欲暗峰過橋逢野寺一逕入深松

二

傍山春更好散步一相從密樹封荒殿圓苔上古鐘門  
通橋北路雲鎖塔前峰斜日西山下歸鴉認故松

挽劉鍊師

日暮雲深處王孫不可招鐵橋春未度丹竈火初銷誰

柱開山杖空留煮月瓢  
海風鶴駕遠疑赴閬風朝

邊警

枉矢機槍逼斗杓  
邊城烽火縱天驕  
經年戎馬虛奔驚  
向夜星辰半動搖  
外府盡煩劉轉運  
北軍爭得霍嫖姚  
桑中一飯猶知報  
樗散無謀補聖朝

七夕

綵綫珠樓月半輪  
共看河鼓會天孫  
兒童爭喜蛛絲網  
庭院何慚犢鼻褌  
書傳古香生齒頰  
機梭空影落匏尊

橋填鵲石通銀浦乞巧何時叫帝閣

潞河舟次

萬艘風集潞河陰同是臣民拱極心人望京華依北斗  
津通析木貢南金峰房井井吹煙突龍舳年年逗石林  
我亦荷君慚肉食為言國計轉愁深

送友奉使郢州

春草離離春水波春卿南下興如何江頭鼓吹迎旌影  
望外風煙入櫂歌獨上紫壇開玉璽共看蒼節度銀河



君王南望時當寧夢裏清班幾佩珂

二

丹書金冊重封題親遣儒臣賜剪圭天建楚邦分社土  
人迎漢使築沙堤危厓藏裏菟遺傳古草堂邊詠瀼溪  
十二樓頭懷國夢客窓時誤聽朝雞

宮詞

中年纔出上皇宮偏得君王寵幸隆東內有時朝太后  
情知不是舊家風

二

蚤詣圖史欠吹噓長侍官闈備掃除一日詔宣充典奏  
秩名應賜女尚書

見梅一首

慣依書舍與漁家多在山根與水涯小院可人惟一樹  
月明籠得半窓花

詠梅

夜深和月印窓紗宛是孤山處士家短角城樓隨處起

莫教吹到落梅花

熊一卓

送許給事中啟衷使交趾二首

春明發車騎，合沓集川原。  
美人使絕域，相送東郭門。  
君去豈徒然，能令中國尊。

邈矣南荒地，于今過使君。  
蠻王拜帝勅，草木識人文。  
日月興圖外，應歌銅柱勲。

見新燕有懷

城隅有高館宴坐常寂寥海燕及春來雙飛還舊巢昔  
去誰所迫今來誰所邀何事同心人一去邈難招

寫廳壁桃源圖

聖皇御海宇邈無夷夏分羣才爭洗濯鳳凰遊中原乘  
時佐休治史籍騰清芬聞有武陵源流水隔塵喧當時  
避秦者此地忘朝暉花飛崑畔雨月落松間雲引領無  
翊戴低頭麋鹿羣住世長子孫徒喧晉宋文悠悠竟無  
沒遺踪安足論

中秋同獻吉諸公登鏡光閣是夜無月

羣鷗駕言返暮霏擁林塘出寺復入寺嬉遊殊未央  
公素耽客展席臨中堂銀膏照四壁團月出未光遲遲  
動深酌語靜聞啼螢爰以結歡好婉孌金玉章願為雲  
中鶴比翼同翱翔

野坪為馮治之作

古樹藹叢薄修原帶郊坰悠悠天容展瀾瀾地勢縈桑  
麻蔭其中朝暮聞雉鳴遊者終良辰樵牧日營營倦翼

集幽林歸雲野墅橫游子抱真性念此動高情寵盛功  
弗居終以託吾生

歲晏和仲默韻

天涯寥落客歲晚獨含思白日當空速歸雲帶雪遲風  
煙憐去住節物愴心期對酒那能樂攄懷一賦詩

送獻吉歸里

相送轉惆悵天寒聞暮鐘高鳥去不息浮雲來幾重河  
關經舊壘墟里對孤松結束平原騎翩翩塞北逢

和何仲默遊靈濟宮韻

乍識花源路  
蕭然世外居  
玉壇秋雨冷  
紫閣晝陰殫  
玉傳竒訣抄  
方簡異書却  
憐車馬客  
羈束未能疎

和復李獻吉懷韻

暫出邊關道  
親交念別羣  
新蕪炎雨長  
遠樹夕陽分  
路險平連塞  
屯閒亂點雲  
無眠山館夜  
惆悵正思君

上元和廷實韻兼懷獻吉

今夕復何夕  
千門候月明  
浮雲生漢苑  
積雪霽秦京  
漏

下車塵暗宮中火樹晴美人一水隔竚望淚盈盈

送王衍之還陝和廷實韻

遶遶郊門道沙寒驛路微煙花行客晚京洛故人稀  
野岫孤雲沒春山獨鳥歸秦川隱關塞一望一沾衣

見白髮有感

四十年餘添白髮却因頭白憶青春初緣愁病斑斑出  
自落風塵種種新已訝入梳紛滿面每於臨鏡一傷神  
官途役役羞看汝勲業猶慚報主身



觀江漲詠懷

拍江忽傳春水漲柴扉即傍浪花開帆衝急雨籬前落  
鷗逐奔濤樹裏來已被風光時引眺况多愁病獨登臺  
欲行何處有舟楫遲日蘋風生野哀

立春

歲前三日春歸早庭樹東風款款吹野屋尚稀花照眼  
江門應有鱸魚絲高堂雲物供時賞久客山川動遠思  
短世行歲方自愛任教斑鬚漸差差

用前韻懷友

幽棲白鳥甘分席濁酒春風只掩門  
谷口豈無停驥宅南陽實有卧龍村  
高天野寺煙花豁細雨河橋草樹渾  
多病獨愁稀會面古來交道與誰論

寓大寺留題

今朝方外堪乘興廿載江湖只夢思  
老去煙花休浪笑向來猿鶴果相疑  
松根草坐春從暖竹裏溪行晝每遲  
世慮久知非我意人間何物更多岐

秋日過南湖小館

西風落葉冷侵衣坐倦江樓思入微鳥逐午雲過竹逕  
鷗翻秋水上苔磯閒花幽草各自媚社燕賓鴻相背飛  
自分心情渾吏隱風光傳語莫相疑

送陳文鳴

瀟湘從古稱佳境冥漠江湖夢見之竹浦娟娟風色淨  
花垣冉冉畫光遲香輪芳草客未倦短笛孤舟人更吹  
獨有美人圖畫裏楚天煙水總堪思

除日雜懷

孤城曉角清霜度近市柴門旭日開  
羌笛戍關情欲斷  
蘭橈沙際首空回風塵荏苒催蓬鬢  
雲物淒涼戀古臺  
却憶帝鄉仙馭遠漫天雨露不勝哀

登翠華巖

勝地來過雙眼明翠華巖上春日晴  
水禽飛來浦潄靜  
山郭浮近川湖平濃花古洞幽幽發  
細雨寒原黯黯生  
遊宦偶然耽野趣題詩長憶謝宣城

送同寅郭魯瞻犒戎宣府同廷實伯明

嫋嫋垂楊拂御溝  
青青芳杜徧春洲  
三關路接邊城迥  
獨樹雲移使節幽  
月映寒塘生遠夢  
鶯啼深院亂新愁  
丈夫早試安邊策  
坐制河山百二秋

送顧進士使浙纂修

漠漠江湖生遠愁  
青青蘭杜繞芳洲  
煙林對酒濃花發  
夕館懷人長漢流  
吳下清風過舊宅  
越中啼鳥伴行舟  
公餘定自多詞賦  
司馬才高更勝遊

立春

紫閣晴雲流複道竹門初日麗芳塵  
籬前雪水繞村白湖上柳條垂路新  
冷雨淒霜應却避流鶯乳燕漫逢辰  
獨憐漢使浮槎近翹首星河萬象春

巡廣過家朱君佐設飲寺中有贈用其韻復之  
時君佐書考北上

野堂高會麥秋天憶共攀花十二年  
座對薰絃如昨夢棹迎芳草又離筵  
乘時鸞鳳雲霄立抱日魚龍澤國眠

只恐天涯來雁少瘴鄉秋色渺風煙

送朱君佐應朝北上

花封暫假金閨彥  
啓戟遙臨劍水清  
芳草幾年勞別夢  
寒雲十月倍離情  
居人愁望青鳬遠  
仙侶同飛彩鷁輕  
賈誼定應前席問  
經綸知不負蒼生

觀春水有感

二月煙濤天際來  
病懷憂思一登臺  
濕雲屯樹鶯新到  
鳴雨灑江花亂開  
坐浪漁舟終遠去  
橫空隼鳥亦低迴

香蘋欲採汀洲遠目斷蘭橈心更哀

懷京友

閨苑十年同會好滄江千里獨栖安  
燕臺遠樹春雲暗楚館繁花晝雨寒  
不分山鐘搖夢促無端海鶴度書難  
傷心桂棹風波隔日晏空歌澧有蘭

遊感山用老杜韻

野寺來遊記往年入門流水漫潺湲  
交游白首憐誰在塵路青山有夢傳  
禪榻卧雲疑隔世暮鐘聞浦未回船



春潮來往君休問無事沙鷗只晏眠

春興

塵世光陰徒草草林居風物亦菲菲  
花間雨濕身常慣竹裏月明人乍稀  
昨日暖薰幽澗草春雲新長北山薇  
滄江白鳥知人意戀戀沙橈故不飛

汪司驥席上對菊

錦席秋軒流客觴階除遲菊戀年芳  
翠條冉冉初經雨青蕊娟娟欲候霜  
幸為分回供閒寂空然別去夢寒香

小車如覓東溪路敗屋疎籬是醉鄉

贈友人約往看菊

愛汝野亭風日幽寒花石路晚雲稠關心異品虛看譜  
滿目清霜可負秋仙侶自應吟闋圃儒衣能許坐寒流  
草堂空閉閒風雨為惜年芳易白頭

和獻吉晚出禁闥

遙望朱門啟宮花映繡盤年年春二月燕子入長安

春日謁陵途中

耳畔聞啼鳥悠悠客路情山城春共遠花發不知名

送客城南

楊柳河橋館春風倒玉壺離情不可道江路滿蘼蕪

送客南還有感

遙望城南道青青草色新春風生錦棹時送楚江人

出居庸

沙上望行人日暮愁心絕江南四時春邊地五月雪

懷友

驛路連雲暗溪朝帶月渾美人不可見此夜欲銷魂

山中口占

亂石蒼松逕藹藹春風和白雲不作雨空占碧山阿

山西郊聞鶯

冉冉郊西路繁煙弄柳條東風殊解意催送鳥聲嬌

春水和杜子韻效其體

何處水來驟爾強漲號徹夜誰能當開門江檻已不見  
幾個輕鷗浮席傍

原書末行卷次訛誤

經姑蘇有感

闔閭城邊迴短棹行行煙柳入江皋  
萋迷碧草吳宮裏  
春色年年發絳桃

石倉歷代詩選卷七十一

欽定四庫全書

石倉歷代詩選卷四百七十二

明 曹學佺 編

明詩次集一百六

孟洋

別家

僕夫早嚴駕行行之楚鄉依依戀故里尊俎臨道傍親  
友偕集送兒女泣成行鄰國非遐征歲月未可量白露

塗郊原秋草日焜黃沙禽並棲宿鴻雁東西翔且為斯  
須留日晚途路長不云行役苦徒令居者傷

宿華陰懷馬侍御按節河中

客路倦茲遊空堂此何夕明燈促簿書春星動簷隙渭  
北鴻雁來猿吟華山側濁流一何深佳人杳難即遙遙  
欽德音茫茫阻顏色笑言故山廬繁華憶疇昔皎月照  
巖阿凝霜肅荆棘蕭蕭馳馬鳴豺狼遁其跡豈不慰遐  
思終焉感離折思欲往從之安能生羽翮臨風緘素書



書短不盈尺上言加飧飯下言崇明德

貽友人

清雲度高漢落日下遠戍行子倦孤征稅駕咸陽暮空  
林宿雨微虛簷滴松露悵然懷美人昔語今不晤濁酒  
誰為傾強歌未成趣豈無四海士新交不如故

送王子衡巡按陝西得倚字

孤鴻遊八極日暮宿江汜紛紛四海士緬懷念君子逍  
遙幽澗濱采摘多芳芷嘉晤苦歲遲乖別遽千里商飈

肅秋林祖席臨寒溪諒子平生親贈言豈在累初冬出  
函谷飲馬黃河水巉岈走虎兕夾道生荆杞莫邪鳴鞘  
中一日再三視試以寬解宜衆理良獨恥仰瞻太華巔  
霜峰碧空倚丈夫處兩間氣槩諒可擬三邊堆火連漢  
南冠遙起折衝貴笑談何必任鋒矢願言樹名勲慰我  
胎尺鯉

贈郭侍御北還

揚旌渡河渭弭節覽周秦靈臺豈經始古道多荆榛歷

險迫崑谷乘危犯沙塵  
冷冷清風激霜月鑒幽淪  
豺虎潛故踪狸鼠安足論  
中衢有歡頌窮簷無苦呻  
鞭笞非所恃風俾江漢淳

追懷張徵君

青青岩畔松漠漠谷中蘭  
孤貞抱幽寂芳馨恒自憐  
移植公府中土性非所便  
至人尚玄素哲士保自然  
靈霞盪心慮塵紛詎能纏  
守身戒枉尺行義恥忘筌  
結廬西山麓泛舟河水湍  
雖非金石固神理諒可全  
生時有遺

榮沒為閭里嘆

漢中太守行贈潘伯振

漢中太守行出門蕭蕭五馬鳴  
秋原請君繫馬亭前柳  
為君贈言勸君酒漢中巨郡獄訟繁  
饑饉頻仍足羣醜  
蜀川廉范有遺歌關西楊震稱良守  
使君才質迥非常  
十年獻納黃門郎曾將五色繡龍袞  
何有一郡分銅章  
君不見棧道逶迤數千里高山岩崿水  
瀾瀾此去休歌  
行路難擬取循良報天子

送鍾廣州賦得越王臺

漢家南越郡海上起高臺紫翠朝雲映笙簫落日催千  
秋樂事今消歇碧榭朱欄臺草沒山鷗空啼榕葉深荔  
枝猶待春風發太守來遊發興豪雪山日鏡擁溟濤右  
瞰雙溪小回瞻五嶺高開元宋公韓吏曹賢聲此輩俱  
翔翔別君且盡杯中酒越王臺上應回首

夜泊石頭口

初月照江清愁人見月那為情寂寂空江徒極目扁舟

獨伴魚翁宿舟人盡睡不知醒防夜知更喚僮僕然燈  
起坐心膽摧况乃隔岬聞猿啼秋潭無雲渚花落寒波  
欲動風淒淒中流賈爾何苦猶唱棹歌夜搖櫓北客聞  
之淚如雨

沽酒行贈牟韋二撫君

漢陽江山秋風悲落葉淒淒愁別離江頭壯士一相見  
並馬躊躇數回盼青衫烏帽無光輝云是長安兩錦衣  
見君北來動鄉思君來想是從王畿牟公短軀異標格

雙頰凝紅鬢垂白韋君年可四十強方眉廣額身昂藏  
欲言向余淚盈臆昔年奉侍君王側日月麒麟殿上行  
雲霄虎豹班中直常承密旨按公卿時有微功佐家國  
詎料恩榮不可常朝遊禁闕暮江湘遙瞻北斗空翹首  
却想西垣祗斷腸北地南州異風土天暄水濕多憂苦  
鴻雁高高向日邊關河迢遞何時還嗟余亦是投荒者  
低首聞之淚雙下先朝未載游帝京此時牟公已有聲  
自從逆醜弄權術鞭撻朝士無虛日扶忠抗義公所優

坐廢罹刑人共恤今皇誅逆法令明韋公牟公乃齊名  
纔看執法拖金紫忽復飄零涉江水貧賤榮華信有時  
古今人事皆如此君不見張祿先生脫廁中相秦富貴  
傾王公又不見魯朱家奴置廣柳時來復作河東守與  
君今見且為懽別買江魚共沽酒

顧全州見邀江水漲不能赴

桂林山深晝啼鷓一春三見紅日出鳴雷達曙雨浪浪  
洪潦平階仍入室江間浪湧蛟螭翻鯉魚安得窺龍門



渡頭行子立惆悵徒繫扁舟不可上美人只在水一方  
百遡千迴道轉長雨中空見枇杷落飛盡楊花更斷腸  
送殷近夫尹靖江

靖江百尺澄秋波江上秋風吹薜蘿蘆花鳬雁鳴相和  
江南女兒紅碧衣日浣晴沙薄暮歸手牽蘭杜不忍違  
秋容入佩香風微短棹吳歌處處吟歌長調切傷人心  
江天月出江水深遠客聞之淚沾巾孤山此夕好登臨

題畫

丹青妙意畫莫測一幅寫盡秋江色天遠平看楓樹林  
雲長不辨鴻飛翼崖半青松縮夕煙洞門亂石繞寒泉  
羽客看山坐松下橫琴不語心悠然孤舟短棹清波裏  
煙雨霏霏笛聲起蘆葉青搖洲渚風蓼花紅映江心水  
松下舟中俱隱淪城闌車馬徒紛紛悵然省識畫中趣  
何能歸來江上動鷗羣

湘水歌

我聞越人去國見形似而喜仲尼適齊聞韶樂而嘆

宣不以希音難遇良晤靡常也哉昔東橋直道謫  
守湘州賤子多辜放流桂郡慚非郭李之儔竊幸  
同舟竟等參商之迹仍悲各處顧卿懋涵東橋公  
之子也乃乙亥正月浮游桂林將命若翁下迎賤  
子明晤若神才華如海素質資于庭訓青年邁乎  
等夷造霸容儀豈數令狐之兒過戎良久敢謂嗣  
宗之鑒竊附古人托交小友宵談以希旦夕遊而  
自期興緒雲長辭氣鋒出冠服生洞壑之光題詠

盡江山之麗氣乎趨同蘭深膠合此豈徒見似之  
喜聞樂而嘆者哉嗚呼飄蓬踪迹不可以常折柳  
心情孰不云苦煙渺渺而碧蕪遠花霏霏而黃鳥  
鳴迎落日以舉觴逐征雲而解纜矧余一枝之棲  
未安萬里之心常繫惆悵臨江徘徊送遠卿亦莫  
賴余復何堪維茲傾城賢士洎吾在門小子咸覩  
翔鳳之姿各贈登仙之咏余亦作歌并序諸首用  
酬君子青瓊之章敢辭鄙人白豕之誚乎

湘水綠色波瀾瀾石樹參差岸烟起芳洲蘭葉搖香風  
日暮千林萬花紫春無鴻雁隨陽和晝見獼猴挂薜蘿  
谷深疑有秦人住澤畔時聞漁父歌獨愛蘇吳顧虎頭  
謫官五馬來湘洲郡中無事常高卧忽復乘舟泛碧流  
醉邀明月不知返曲奏陽春恒寡酬神簡郎君更清出  
小顧阿髦誰甲乙陳荀王謝久塵埃君家一門皆俊才  
班揚已去蘇李死氣運文章喜再回德星遠向庭闈聚  
堂上春陰覆瑤樹柳山雲物春更嘉翠竹寒泉啼鳥譁

昔人尚有讀書屋君復題詩躡紫霞

人日

去年人日潁水濱今年人日長安上白雪青尊憶故人  
長煙平樹空遙望苑外寧無楊柳新水邊不見梅花放  
天南地北總支離瘦馬東風倍惆悵

漢宮詞

憶昔妾當二八期正是漢家全盛時九重下詔擇鸞匹  
萬國求賢配鳳姿妾身自分非良質百萬人中叨第一

天子親迎出殿廷  
輔臣持節下蓬華  
蓬華輝光異昔年  
絲蘿延蔓至今日  
始知貴戚失金張  
不許王侯論甲乙  
一入金門侍至尊  
奈何相見不相言  
紅顏未必招人妬  
薄命何堪承主恩  
主恩深重應難報  
妾意殷勤那復論  
一別謝君面往駕  
無旋轅夜夜看星回  
永巷朝朝望日倚  
長門長門永巷春  
風起萬卉千花鬪  
芳紫燕予飛過  
密杏中黃鶯啼向  
垂楊裏鶯鶯燕燕  
各相依戲蝶遊蜂  
兩兩飛可憐今日  
春光好可惜明朝  
春又歸鳳輦常時

遊上苑羊車無日到重扉  
豈干待御還多寵自是君王  
有萬幾萬幾閒暇甘遊獵  
朝出城南暮城北金鞍玉騎  
走千軍羽箭琱弓墮雙翼  
陌上風光自可嘉宮中粉黛  
無顏色離宮一萬所別殿九  
重深豈有榮華希寵愛更  
求詞賦感君心何人可托黃  
金贈薄情不見白頭吟珍  
珠簾下閒歌舞且取歡娛謝  
愁苦自愛瓊簫引鳳皇自  
愛金杯度鸚鵡鸚鵡性能言  
不能到君前一朝被籠絡  
翠羽徒自憐不沐君恩奚足  
惜不見天顏心未懌天下



昇平主萬年  
妾身生死良何益

舟過城陵磯悼內兄舊已陵尹

已陵原上秋草沒  
岳陽城頭挂殘月  
嘆逝中宵懷不開  
江流嗚咽江猿哀  
昔行縣中花今餘  
道傍柳可憐勁節  
胡爾為徒取虛名  
在人口朝雲為雨  
暮歸山秋燕辭巢  
春復還青山玉骨  
何處起鬼火妖狐  
滿蒿里思君懶入  
已陵遊已陵道古  
生百憂

瀟湘行

歲暮浮瀟湘天空豁心目霽日千林開高雲萬峰簇江  
色巖霏水郭隈垂蘿飛幌隱樓臺疎松野寺鐘磬響枯  
葦沙汀鴻雁哀風煙奕奕紛奇狀海賈湖商日流盪浣  
婦新粧映綠波漁人密罟拋洪浪年年歲歲此江津今  
日人過非昔人曾聞埋沒屈原骨不復飄零賈誼身楚  
人宮中罷歌舞十二峰頭泣雲雨岸上誰家越女謳珠  
簾羅幕挂堂幽江南本自山川勝日暮其如客子愁當  
昔孫吳漢照烈衡湘轉戰江流血功臣名將已寂寥石

碑銅柱俱淪滅秦皇威力震羌胡仍迴車駕徧寰區馳  
道至今瀟水上秋風惟見白雲孤白雲孤以飛湘水自  
南下安得從之亦北旋東園種竹耕西野

題宋徽宗杏花錦鷄圖

北風十月登華堂堂上春光照花樹雪壁熒熒絢綺霞  
晴煙拂拂流香霧彩筆誰將奪化工珍禽艷萼披霜素  
洛陽殿前仙杏開錦雞石上矜毛羽出羣畫手近代無  
趙宋徽宗為此圖規規模寫不足數生意真與乾坤符

煙枝露蘂宛堪折戢翼回頭如有呼上林韶華竟何似  
滿堂醉眼俱模糊國朝畫者稱林良古松蒼鷹乃所長  
後有呂紀善畫鳥形象雖工神色少帝王妙思非等閑  
意態不在丹青間定知萬里胡沙外貌得關河北雁還

天馬行同唐荊川太史遊普濟寺作

風催白草霜葉丹嶙峋黛色標南極晨起衝寒恣攀陟  
捫蘿策杖嗟無力林壑陰森運轉迴赤霞掩映青蓮開  
殿閣參差翠微畔黃金作戶玉為臺玉臺金戶通流水

門外孤峰插天起往往飛花下石壇呦呦馴鹿臨崖漢  
脩竹長松煙雨間鳴琴對月醉忘還回首氤氲渺城市  
悠然身世非人寰江東才子金閨客遙下天門飛漢節  
覃恩中土煥堯文覽勝南州探禹穴嵩高伊闕剽遨遊  
淮汝風煙亦暫留校書懶卧揚雄閣作賦常思王粲樓  
山中載酒摘毫素盡日謳吟倚雙樹飛泉寒谷生光輝  
珠宮畫壁流雲霧蹊路欣看天馬過驚駘學步愧蹉跎  
凌雲逐電燕臺去懸想瑤階響玉珂

發上谷

上谷驅車出雲中  
矚望頻荒山曾過虜殘壘半無人雲  
冷低關樹風多暗塞塵翻思戎馬事愁病轉傷神

明妃曲

朝辭鳳城闕幕出雁門關漢音聞漸少胡語辨應難玉  
筋軍中落琵琶馬上彈宮闈閒冶態遮莫外人看

除日

邊城除日至猶自備戎機馬上驚殘歲河邊對落暉逢

人空間訊逾節始言歸回首年來事徘徊一振衣

別都玄敬主事改南京禮部

迴車塵路輟停棹故山廬祿薄堪迎養官閒好著書吳  
門楓樹色京口菊花初到處宜乘興江樓坐月虛

過張元德戶部同遂伯二首

登龍來委巷下馬索新題砌晚蒼苔靜盆陰碧草齊苦  
吟憐賈島高論接昌黎興盡揮鞭去紛紛月滿蹊

王郎多逸興張子更清談詞賦誰當並交游我獨慚晚

風聞竹碎霏月對花酣轉首成宵夢梅開湖水南

憩冷泉寺

漫入冷泉寺居然外慮空雲來千樹黑日斂半山紅  
法鼓傳虛殿禪音出上宮興來孤騎發汾水正秋風

約蘇天秀年兄會鳴謙驛

季子二年別銅章百里分形容空有夢消息漫相聞  
惆悵西山月淒涼北塞雲驛樓風日好尊酒待夫君

中元



沙塞沈沈夕山城瑟瑟風旅愁紛落木鄉信斷飛鴻  
明月誰家好寒砧到院通應知早成服為寄遠從戎

元宵後聞雁

昨夜元宵節今晨鴻雁音索居纔入耳為客即驚心  
楚雪江湖遠燕雲關塞深翻然動春興出戶已難尋

弘慈寺訪羅侍御不遇

騎馬出城郭逍遙訪所親高林浮薄日古寺入殘春  
細簷花靜嚶嚶谷鳥頻風光助吟咏發興為誰新

送韓汝節

春月高城上，酣歌此宴同。  
旅愁鞞鼓外，心事酒杯中。  
雨雪辭燕甸，鶯花過晉宮。  
休將萬里志，今日歎飄蓬。

雨中期馮都憲高太守寧僉憲遊賢隱寺

相期遊野寺，不寐憶松房。  
細雨蒼山濕，高雲碧殿涼。  
沙行看逸鷺，石坐傍幽篁。  
準擬侵晨往，衝泥定未妨。

煙

湘流落日外，沙迥暮生煙。  
杳杳千峰失，霏霏萬壑連。  
鵲

翻知浦樹人語辨江船暗裏猿聲斷愁深攪夜眠

全顧二刺史遊抑山祠

昔慕抑侯迹今逢顧守遊山形盤野壑樹色動江流  
城郭登臺暮風煙倚閣秋不須松下酌深坐已忘憂

入嶽

僻路疑無日危梯漸入煙暗泉傳石竇高稻疊山田鷓  
語深叢裏猿垂古洞邊清秋未搖落百事總堪憐

宿上峰寺喜晴

俗傳衡嶽往頻見雨雲俱何事秋天霽能令皓月孤平  
看窮蜀粵俯影辨江湖取謂精誠在山靈定有無

黃刺史同登岳陽樓

此地昔曾過危樓今始攀日銜天際樹雲動水中山津  
驛趨三楚江關控八蠻亂帆何處去風浪未知還

石首訪趙從之

昔在長安日相從數宴遊烏啼花館夕騎轉竹林幽明  
月空燕市春星映蜀樓那知風雪裏坐對楚江流

酬馬百愚過訪

白首誰知己秋風此對君  
年光吾自老世事忍相聞  
樹近微留雨簷虛暗入雲  
莫辭今共醉應念昔離羣

秋盡田家

秋盡登成後田家樂事多  
臨泉滌酒器向日理漁蓑  
野澗孤煙起沙長倦鳥過  
客來聞犬吠却恐是催科

簡孫兵憲用之約遊賢隱寺

秋來山寺好霜葉靜高林  
水落澄潭色雲垂古殿陰  
公

庭虛簡牘暇日且登臨早起瞻旌蓋遙遙指碧岑

山居祿興

地僻人煙少山空秋氣寬簷迴千樹響門對數峰寒  
隔竹聞雞犬臨溪采蕙蘭涼風天際起哀雁出雲端

又

沈沈煙色暮眺望此何時萬壑翻紅樹叢篁映碧池  
路高寒吹急野曠夕陽遲不作陶翁醉能無宋玉悲

別殷靖江限韻

昔也石川去居然宦思微獨憐江上縣何異水邊扉春  
雨移萱草天風入舞衣留連今夕飲愁見月光輝

重過康莊驛

汝上初經月康莊茲再行孤心天外繫白髮道邊生雪  
草交狐跡風沙鬪馬鳴遙憐清濟色未肯濯塵纓

訪龍洞

野情塵外愜秋思馬前生去雁迷山色懸藤落澗聲洞  
空千樹響雲細一花明漸覺人踪絕煙霞近赤城

駕出南郊

御輦層霄下春宮萬戶開天文移漢闕雲氣擁仙臺  
騎引麒麟出旗迎翡翠來北辰瞻望地南斗復蓬萊

天寧寺

招提臨漢迥壯麗入秋明水曲秦淮樹山迴建業城  
僧來呼鶴舞客醉數猿聲坐久餘殘照淒然風露清

別胡茂卿推府往吳興兼呈劉養和太守

吳興非遠別客路亦關情細草迎船發春雲對浦生  
西



亭饒抑色苔水乍鶯聲謝傳仍為郡登山擬共行

同崔岱屏衛源上舟夜抵新鄉

風塵移使節燈火共仙舟霧月涵波動秋星拂樹流暗  
村喧鼓角深渚靜浮鷗白露薰葭落思君難重遊

暮春後園一首

暇日西園內問春春欲歸雀驚看果落蝶懶覺花稀積  
水斜通徑遊絲暗着衣流光不可轉心事苦多違

遊山遲唐荆川太史不至

野興朝來劇層陰凍不開煙霞迎使節詞賦憶仙才豈  
負青山約何妨細雨來臨溪重回首沙鳥似深猜

贈蔡給事成之福建僉憲

君行不得送怨恨若為平塵隔長安樹烟迷上苑鶯闌  
河萬里道風雨十年情重別心如醉長歌涕滿纓朝廷  
虛衮職海內盡戎兵豈是無山甫誰能惜賈生衣冠輝  
瑣闥諫疏耀承明即喜朝陽翼翻為瀕海行三山沾惠  
澤百粵見澄清遠擬丹心迥時瞻北斗城

贈雲谷翁

白雲滿深谷，愛爾結幽居。  
竹影宵穿戶，松陰日覆渠。  
僧歸鄰寺寂，客至野堂虛。  
過嶺時馴鹿，臨溪獨釣魚。  
月前墅局花映北窗書，誰識王孫意頻回。俗士車

贈榮上人魚呈顧全州

古有高人興，今看靜者流。  
江山成獨往，風雨一孤舟。  
卓錫湘流暮，移帆桂水秋。  
朝登覆釜觀，遠望蒼梧邱。  
目極南中勝，心非道外求。  
逢君看葉下，謫客共萍浮。  
暫結三

生願何孤萬里遊白雲懷舊國細雨別津樓  
碧樹諸天迥黃花絕塞愁行過五馬第持此謝全州

九日登堅山十韻

辭喧來野寺九日復登臨遠戍垂天際孤城帶水陰  
風雲盤衆壑鴻雁避危岑騎轉奇葩亂泉飛雜珮侵穿林  
饒虎迹俯磳有龍吟作賦慙先哲遊觀愜素襟帽隨楓  
葉墮杯映菊花斟何事牛山淚空懷鷺嶺心  
芝萸香細細攀桂碧森森歸卧松房寂猶聞長嘯音

紅德城元夕

清平驛裏過元宵尊酒盤蔬未寂寥燈火忽疑烽火至  
春風仍似朔風驕月臨漢節千山靜霜入胡笳獨戍遙  
想是大酺通海內邊城歌舞荷清朝

題張氏忠睦堂

曾說門牆廢蓼莪且看帷幄富干戈朔方孝友今張仲  
南國勲名漢伏波綠野堂開春縱酒紫荊花發夜聞歌  
不知近日談經處更有何人問字過

冬日宴鄭汝順別業

鄭生負郭有田廬  
花榭茅亭背水居  
日照霜林松獨耿  
雪消冰岸柳將舒  
呼童掃石驚沙鳥  
對客開樽取澗魚  
不到山窓今幾日  
白雲猶護讀殘書

送王太常季徵

太常清重異他鄉  
才子風流擅兩京  
春水揚帆辭建業  
東風策馬過彭城  
一夔自足聲容美  
三禮由來職事榮  
擬濟中興垂今問  
漢廷休道叔孫生

奉和白樓太宰齋居

畫省清齋此日同  
聞歌白雪狂詩筒  
瑤壇玉殿虛無裏  
翠蓋金輿想像中  
階下莓苔侵暮雨  
苑邊楊柳入春風  
低棲鸛鶴休飛去  
對爾忘機學海翁

酬柴光祿春日喜晴見貽

雲遠天空候雁翔  
林開晴日散羣芳  
柳條近水烟逾碧  
梅蕊無風暖自香  
江上青山憐歲月  
鏡中華髮愧行藏  
忽傳一曲陽春調  
睡起高歌引興長

臘月朔雨有懷邊司徒華泉

白首相知海內稀司徒高韻苦相違寒烏獨樹雲陰合  
暝竹空簷雨色微終日簿書知有政十年朋侶賦無衣  
北風倘會山陰雪乘興何妨夜叩扉

朱氏園亭宴集

上國名園笑語同朱簾翠戶曲欄通管絃夜合蘆洲月  
花竹煙開水閣風葉撼秋聲翻露下雁飄寒思入雲中  
淹留總愛青霄客潦倒真慚白髮翁



次韻答周刑侍見和桂林之作

除夜俄逢繫綵舟  
新年重喜接風流  
春煙坐對晴江樹  
霧雨心驚瘴海樓  
聊假清尊驅別恨  
却緣華髮動羈愁  
青山二月啼鶯徧  
水外花邊共爾遊

答顧全州華玉寄書

全州書謂余為浮湘佳侶  
至麓口知余舟方過數  
日追之不及失良晤云  
余出京景內翰伯時有湘  
南逢顧況之句今乃弗果  
已因憶唐宋之問端州

驛題壁作甚類我二人又全州過豫章李獻吉附  
寄余詩簡慨然咏此以答全州

並向明時作放臣殊方本擬日相親  
蘭舟空喜浮湘侶  
桂嶺悲看對月人  
太守書來知駐節  
崆峒書至益沾巾  
湘南顧況今虛語  
岐路南中事更真

過大梁貽李獻吉

兩年不見空同子  
楊柳青青汴水濱  
避世獨留瓜圃在  
著書吾愛草堂貧  
門前雪盡添春水  
江上梅開傍野人

竹筵不曾延俗駕思君何日得相親

聞雁

早春入夜尚淒風孤月纖纖生遠空  
萬里獨愁南望客一聲何似北來鴻  
往秋共逐嗟行路此際相逢愧轉蓬  
多思欲歸絃調裏哀音已過塞雲中

望太華

十年太華遊山思五月潼關騎馬來  
日動松林仙掌出雲移蓮井玉峰開  
北涵渭水生秋色西帶秦京鎖暮哀

安得從容應畫興翠微深處訪雲臺

石溝

鹽井黃沙迷白草石溝殘日下荒山烽烟暫喜連朝息  
旌節遙從萬里還秋早兵戈屯塞上風高鼓角動雲間  
西陲諸將今非昔胡虜無勞數扣關

環縣

靈武城高接夏州逶迤山勢引邊愁胡來六月常烽火  
農起千軍盡戍樓草樹陰陰刁斗夕雲沙莽莽玉關秋

比年耆舊多湖海節制誰能范老儔

襄陵省中池亭甚佳因懷張李二明府

日暮襄陵池上亭孤吟長坐嘆飄零荷花無主誰為色  
竹葉憐人獨自青暝逼高林回倦鳥風生曲檻度流螢  
季鷹元禮俱何在好對青霄倒玉瓶

道井陘有感

東歸石逕入雲斜險阻千年事可嗟松栢森森韓信廟  
山河渺渺沛公家王齊寶名遊雲夢為漢虛勞問左車

惆悵英雄心事在烏啼秋樹墮巖花

送邊荊州廷實賦得一柱觀

松滋縣東一柱觀君達荊州春正深風落澄湖翻夕照  
雲移別嶂入晴林花間日見江猿過竹裏時聞湘鳥音  
千古洞庭存勝槩即憐詞客更登臨

過海印寺

傍湖臺殿何年起遶寺烟波望不窮寺裏逶迤銀漢接  
宮前宛轉玉河通長橋晚落千尋影高閣晴含萬里風

滄海漫求人世外蓬萊今在帝城中

春雁

即憐鴻雁不相違每到青春見爾歸  
獨夜高鳴乘吹遠九霄聯影入雲微  
上林羽獵終多事北海風煙自可依  
矧繖虞羅滿天下此身那得共翻飛

千佛山

白日蕭蕭秋樹斜碧雲渺渺入僧家  
隔年松塢疑鄉寺一月風塵見野花  
鐘鼓催寒生晚暮翠微含月益光華

開尊不盡川原色發興還如江漢涯

興隆寺齋居

齋日齋居僧舍深  
畫簾花竹細陰陰  
諸天樹色浮佳氣  
下界鶯啼入梵音  
京國風煙虛在眼  
邊城戎馬實驚心  
他鄉自喜逢春色  
不道愁多更苦吟

冬至述懷

冬至陽春節氣新  
孤舟萬里淚盈巾  
千官鳴佩嵩呼日  
九殿垂紳近侍臣  
崩外聞猿為逐客  
山中驅馬避徭人



海天徒抱區區在稽首焚香望北辰

臘日

北風歲暮急孤城臘日炎方見雪清獨秀峰高萬里思  
枕榔樹近一禽鳴桂林遠客違金闕椒酒親臣賜玉璫  
寂寞學宮終日閉倚樓吟望倍愁生

答顧全州華玉見貽

隱几高齋冬日深叩門何處素書臨美人近隔清湘水  
使者空傳白雪吟邊嶠梅花愁聽角郡庭榕葉憶鳴琴

春風好慰同遊興夜月應憐異地心

寄周克之侍御謫居南海

君從嶺海駕輕舟余亦瀟湘遡碧流  
悵望雲天俱墮淚相思月夜一登樓  
魚龍巨浪春應適瘴癘深山雨更愁  
飽食殊方各努力南中佳麗足遨遊

遊湘山寺

雲裏孤亭落翠微林間寶剎隱光輝  
寒鐘寂寂秋花細碧殿陰陰古木稀  
望極煙霞流遠壑行深薜荔引重扉

却悲塵跡同流水聊復高吟傍落暉

南可堂

堂成南郭倚脩林簾捲高窓見遠岑  
掃石秋籬看菊徧杖藜春逕入花深  
天晴猿鹿山中下日落漁樵江上吟  
野興百年無不可桃源路杳莫相尋

夜集劉子緯郎中

門對西城霜月臨雪留風苑北堂  
陰愁看碧草生春色徒傍寒梅損  
客心擊筑未忘燕市酒屬歌猶接  
郢人吟

非貪深坐催雞報苦憶相思候雁音

九日期登高不果遂集王郎中欽佩青谿上限

韻

王子幽居水竹東故人佳節對清風  
愁看叢菊蕭條甚興引高臺悵望中  
日靜鍾山流遠碧天寒楓樹落殷紅  
共嗟物色驚人眼縱飲何辭百盞空

仙真觀

村虛斜日映霏微蓬苑丹霞閃洞扉  
竹霧乍沾車馬色

爐烟常駐薜蘿衣  
嵩垂石髓逢人少  
路塞桃花過客稀  
白鶴歸來莫相訝  
幽房元侶亦忘機

吳松江肅威道此對酒次韻

萍聚京華四海心  
蓬飛歲月故駸駸  
蠻荒獨憶西臺迥  
郡國同瞻北闕深  
病骨逢君慙驥掣  
春山對酒見鶯林  
少陵不作當時體  
千載重聆大雅音

正月三日喜晴

東風宛轉入新年  
林色熹微開曙烟  
梅柳隔簾春欲動

樓臺滿眼雪猶懸  
羣飛鶴鶴翻高樹  
並泛鳬鷗下碧川  
對此不堪多病在  
令人却憶五湖船

贈魯振之祭酒園居

魯連不受平原贈  
長揖歸來住海濱  
寧獨彩毫干日月  
時看玉劍動星辰  
窓含花竹雲爭入  
江引鳬鷗日自親  
天下蒼生望安石  
憑君莫作武陵人

出郊

昨日歸來雪滿城  
暖風三月始郊行  
平蕪渺渺春嘶馬

斜谷陰陰午聽鶯茅屋短挑流水近石橋低柳細烟輕  
十年塵土知何事今日鄉園且有情

殤子八十生日至瘞所

吾兒死別經春久生日今來哭汝墳秀骨清眉泉路隔  
嬌啼澀語夢時聞烟林葉暗鶯初轂草遶花稀蝶自羣  
魂氣可能遊我側須驚愁鬢雪紛紛

贈別張汝楨兵憲兼致留意

冠蓋傾城擁使車柳深花暗重躊躇  
旌搖日月明淮水

帳卷風雲接楚墟春饌正宜供竹笋秋羹何用嘆鱸魚  
樂羊不廢中山績漫有文侯滿櫃書

次韻馬侍御山居

疊嶂叢林卜築新柴門草徑絕比鄰琴尊有意從知己  
衣帽無心懶見人流壑野雲何所繫浴渦沙鷺本來真  
百年幽境容吾老四海蒼生望爾頻

飲崔都尉府

王家仙館接雲城碧樹瑤池暑簟清近苑花風牽霧轉



隔簾荷雨入秋鳴  
登龍自幸開塵榻  
引鳳真如聽玉笙  
李白文章驚海內  
由來詩句下崔生

寄王欽佩提學

雨花臺畔昔年遊  
長憶金陵萬里秋  
春色乍驚河上節  
月華空望汝南樓  
檐帷踏出花相映  
絳帳庭開草並幽  
七郡衣冠瞻北斗  
光風何日被林邱

雨花臺

初夏登臨花未稀  
一春多恨賞心違  
羣峰細雨江流轉

萬戶垂楊燕子歸  
謝傅風流今不忝  
秣陵雲物舊全非  
空臺草長談經處  
風起遊絲罥客衣

有悼一首為華泉大司徒作

早修容服侍明公  
琴匣書籤坐卧同  
春色故隨流水去  
雨聲猶向落花中  
月明東閣凭欄歇  
塵暗西窓倚鏡空  
十二峰頭雲不盡  
夜深還到楚王宮

寺中對雨

古寺天寒樂事稀  
千山風雨賞心違  
松懸瀑布當簷落

竹引浮雲遶棟飛，窈窕烟簾垂虎穴。淒涼水鳥坐漁磯，  
宵來撥悶須酩酊。明發衝泥轉翠微。

白菊

兩兩瓊霜下，盈盈瑤水涯。縱然同晚節，猶自異黃花。

王子衡過飲分體得一首

虛簾過微月，小閣生餘寒。留連異鄉飲，消此長夜闌。

咸陽覽古

長安西出咸陽道，行盡平沙渭水澄。便欲題詩懷往事，

傷心忍見漢諸陵

梁山懷古

秦皇遊幸出梁山翠閣朱樓起萬間千載春風歌舞地  
牛羊斜日牧兒還

塞上行

白草愁連紫塞長行雲落日共蒼茫驅車竟日無村落  
到處逢人指戰場

楊花

幾日春光春又歸  
楊花落盡淚沾衣  
君王未見相如賦  
莫向長門宮裏飛

回雁峰

回雁峰高起夕嵐  
孤舟落日繫江潭  
雁知瘴癘愁難度  
還客明朝路更南

憶花

庭下花枝紅白開  
看花把酒日徘徊  
臨別低垂解愁思  
露珠如淚滴蒼苔

江雨

樹色陰森江驛前  
漁翁蓑笠隔朝烟  
雨中薜荔深藏寺  
霧裏鳬鷺不避船

問愚溪

零陵南上湘流西  
竹樹參差百鳥啼  
秀壁清泉行滿目  
不知何處是愚溪

奉和楊邃菴閣老塞上曲二首

太平天子未忘危  
戰將謀臣厭出師  
不有匈奴頻犯塞

廉頗那起漢文思

飛騎走粟徧秦川  
鐵騎驛弓遠  
戍邊夜聞間諜來  
傳語漢壘如今不似前

湘簾贈張子言

剪斷瀟湘半畝雲  
佳人纖手製冰紋  
含風卧榻吹寒玉  
映月歌筵疊翠裙


寄題林以吉讀書堂

陰陰石閣傍雲松  
娟娟藤窻花露濃  
獨立青宵何處笛

月明遙映九華峰

中秋宴城西樓別張子言

八月天高河漢流  
丹峰翠壑迥西樓  
不堪鴻雁長為別  
風樹蕭蕭萬杵秋



石倉歷代詩選卷四百七十二